

四庫全書

子部

欽定四庫全書

子部  
尚論篇卷三

詳校官太醫院史目臣宋桂

編修臣倉聖脈覆勘

總校官庶吉士臣倉聖脈

校對官編修臣沈清藻

謄錄監生臣馮萬程

欽定四庫全書

尚論篇卷二

新建 喻昌 撰

尚論陽明經證治大意

傷寒之證無如太陽一經風寒參錯表裏差殊難於辨認昌分三篇先列鄙語以引其端後隨仲景原文闡其立言精意俾業醫者得其門而入庶足以窺其富美也而陽明一經之病治之尤難蓋胃

為水穀之海五臟六府之大源多氣多血之術乃  
吉凶死生所攸關仲景著論精詳後人讀之憤憤  
今僭為尚論請得而要言之也夫陽明者胃也陽  
明以胃實為正胃實則皆下證也然陽明之邪其  
來路則繇太陽凡陽明證見八九而太陽證有一  
二未罷即從太陽而不從陽明可汗而不可下也  
其去路則趨少陽凡陽明證縱見八九而少陽證  
畧見一二即從少陽而不從陽明汗下兩不可用

也惟風寒之邪已離太陽未接少陽恰好在陽明  
界內之時用藥亟為攻下則渙然氷釋而不再傳  
他經津液元氣兩無虧損何快如之此等機會間  
不容髮庸愚無識妄守顓門必俟七日傳經已盡  
方敢言下縱不危殆而津液元氣所喪滋多矣況  
太陽一經早有十餘日不解者若不辨經而但計  
日其誤下仍在太陽至陽明二三日內即顯下證  
反以計日當面錯過及陽明已趨少陽又以計日

妄行攻下乃至少陽復轉陽明更全不識其證以至熱邪在胃燥盡津液輕者重而重者死矣所關顧不鉅耶謹將陽明之證亦比太陽之例分為三篇俾觀者了無疑惑斯臨病不致差誤耳

陽明經上篇

凡外邪初入陽明地界未離太陽淨盡者謂之太陽陽明列於此篇

太陽與陽明兩經各半謂之合病兩經連串謂之併病另自名篇於三陽經後不在此例此乃邪入陽明而太陽將盡未盡之證也

一陽明病脈遲汗出多微惡寒者表未解也可發汗宜

桂枝湯

原文

二陽明病脈浮無汗而喘者發汗則愈宜麻黃湯

原文

仲景此二條之文前條云風未解後條即不云寒未解者互文也前條云宜發汗後條云發汗則愈者亦互文也蓋外邪初入陽明用桂枝湯解肌則風邪仍從衛分出矣用麻黃湯發汗則寒邪仍從營分出矣營分之邪深於衛分且從外出而愈則衛分更不待

言矣論中每用互文處其妙義大率若此

三陽明病能食者為中風不能食者為中寒

原文

風則傷衛寒則傷營一定之理是則足三陽經太陽行身之背陽明行身之前少陽行身之側皆可言營衛受邪何仲景於陽明經但以能食不能食分風寒而不以營衛分風寒耶蓋營衛交會於中焦論其分出之名則營為水穀之精氣衛為水穀之悍氣論其同出之源混然一氣何繇分其孰為營孰為衛哉惟



風為陽陽能消穀故能食寒為陰陰不能消穀故不能食以此而辨風寒之邪庶幾確然有據耳仲景析義之精若此如習矣不察者何

四脈陽微而汗出少者為自和也汗出多者為太過陽脈實因發其汗出多者亦為太過太過為陽絕於裏亡津液大便因鞭也

原文

陽微者中風之脈陽微緩也陽實者傷寒之脈陽緊實也陽絕即亡津液之互辭仲景每於亡津液者悉

名無陽本文絕陽於裏亡津液大便因鞭甚明註家  
認作汗多而陽亡於外大謬

傷寒發太陽膀胱經之汗即當顧慮陽氣以膀胱主  
氣化故也發陽明胃經之汗即當顧慮陰津以胃中  
藏津液故也所以陽明多有熱越之證謂胃中津液  
隨熱而盡越於外汗出不止耳然則陽明證不論中  
風傷寒脈微脈實汗出少而邪將自解汗出多則陰  
津易致竭絕業醫者可不謹持其柄而用重劑發汗

以劫人之津液耶觀仲景於太陽發汗之重劑以青龍名之可見亢旱得之則為甘霖若淫雨用之則沈竈產蛙傷禾害稼有載胥及溺已耳此陽明所以有桂枝麻黃湯證而無大青龍湯證也噫微矣哉

五問曰陽明病外證云何荅曰身熱汗自出不惡寒反惡熱也

原文

以此辨陽明中風之外證正兼太陽也

六問曰何緣得陽明病荅曰太陽病若發汗若下若利

小便此亡津液胃中乾燥因轉屬陽明不更衣內實大便難者此名陽明也

原文

以此辨陽明中風之裏證

此屬正陽陽明可下當置中篇以全文不便分割讀

者識之可也

七問曰病有一日得之不發熱而惡寒者何也答曰雖得之一日惡寒將自罷即自汗出而惡熱也

原文

以此辨陽明傷寒之外證正兼太陽也

八問曰惡寒何故自罷答曰陽明居中土也萬物所歸

無所復傳始雖惡寒二日自止此為陽明病也

原文

以此辨陽明傷寒之裏證

此屬正陽明可下

已上八條見仲景於太陽傳入陽明之證其辨認之法即少變太陽之定例矣蓋太陽有營衛之兩路風則傷衛寒則傷營而陽明則營衛難以辨別辨之全藉於脈與證風邪之脈傳至陽明則緩去而遲在寒邪之脈傳至陽明則緊去而浮在風邪之脈輕高而上前者風邪本微殊無內向之意雖汗出少而不為

過也寒邪之脈已至於實則將去太陽而成可下之證故發其汗太多反為過也如此辨別讀者猶不心花開朗耶至其辨證則以能食不能食為諦蓋陽邪能化穀陰邪不能化穀之義也又設四問以辨風寒之在表在裏而定汗下之權衡何其明且盡耶繇是推之病已傳經而太陽邪有未盡其用桂枝麻黃二湯即當狹小其制不可使太過明矣太陽邪已盡其用承氣諸湯即當竭蹶從事不可使不及又明矣

問經言一脈分為二病謂營衛不同也是則十二經脈中以營衛之故分為二十四病矣乃仲景於陽明一經獨以能食不能食分營衛至於少陽以後更不申營衛之辨其義何居荅曰明哉問也道之原也叔和以後諸賢俱有未徹果識各經皆有營衛曷為將仲景少陽經之文編入太陽經中乎後人更添蛇足謂邪至陽明則已過營衛無復可言果爾則邪至少陽與三陰其過營衛不更遠乎靈樞謂營氣起於中

焦衛氣起於下焦而行至中焦是則中焦胃中正是營衛所起之源混然未分而外入之風寒自難辨別也至於少陽以下諸經內經明有一脈分為二病之旨仲景可以不贅况始先中衛其傳經必不轉中于營始先中營其傳經必不轉中於衛然則能食為中風不能食為中寒自可繇陽明而類推三陰各經矣此等處須細心體會畧一鹵莽謬迷多矣

九本太陽病初得時發其汗汗先出不徹因轉屬陽明



也  
原文

發其汗兼解肌發汗二義汗出不徹則未得如法故邪不服而轉入陽明也

若汗多微發熱惡寒者外未解也其熱不潮未可與承氣湯若腹大滿不通者可與小承氣湯微和胃氣勿令大泄下  
節文 全文見陽明中篇

表未解而腹大滿則裏亦急故用小承氣湯

十太陽病若吐若下若發汗微煩小便數大便因鞭者

與小承氣湯和之愈

原文

微煩小便數大便因鞭皆是邪漸入裏之機故用小承氣湯和之是變不可下之例然曰和則與用下之意不同矣

十一傷寒吐後腹脹滿者與調胃承氣湯

原文

吐後而腹脹滿則邪不在胸其為裏實可知然但脹滿而不痛自不宜用急下之法少與調胃承氣可耳此亦和法非下法也觀正陽陽明篇中腹滿不減減

不足言如是之急者止言當下自可類推

十二陽明病心下鞭滿者不可攻之攻之利遂不止者

死利止者愈

原文

心下鞭滿邪聚陽明之隔正兼太陽也故不可攻攻之利不止則邪氣未盡真氣先脫故主死也利止則邪去而真氣猶存故自愈也

十三傷寒嘔多即有陽明証不可攻之

原文

嘔屬太陽嘔多則太陽未除縱有陽明諸症在所不

計故戒攻下

十四食穀欲嘔者屬陽明也吳茱萸湯主之得湯反劇

者屬上焦也

原文

此條復辨嘔有太陽亦有陽明本自不同若食穀欲嘔則屬胃寒與太陽之惡寒嘔逆原為熱症者相遠正恐悞以寒藥治寒嘔也然服吳茱萸湯轉劇者仍屬太陽熱邪而非胃寒明矣

十五陽明中風口苦咽乾腹滿微喘發熱惡寒脈浮而

緊若下之則腹滿小便難也

原文

此條陽明中風俱該傷寒而言俱太陽未除之候但以腹滿一端知為熱入陽明然終與大實大滿不同若誤下則外邪乘虛內陷而腹愈滿矣小便難者亡津液也

十六陽明病脈浮而緊咽燥口苦腹滿而喘發熱汗出不惡寒反惡熱身重若發汗則燥心憤憤反譏語若加燒鍼必怵惕煩燥不得眠若下之則胃中空虛客氣動

膈心中懊憹舌上胎者梔子豉湯主之若渴欲飲水口  
乾舌燥者白虎加人參湯主之若脈浮發熱渴欲飲水  
小便不利者猪苓湯主之

原文

發熱以上與前條同而汗出不惡寒反惡熱身重四  
端則皆陽明之見症所以汗下燒鍼俱不可用而舌  
上胎則膈熱甚故湧以梔子豉而徹去其膈熱則治  
太陽而無碍陽明矣若前症更加口乾舌燥則宜用  
白虎湯以解熱生津更加小便不利則宜用猪苓湯

以導熱滋乾也

十七陽明病汗出多而渴者不可與猪苓湯以汗多胃中燥猪苓湯復利其小便故也

原文

太陽症中有用五苓散兩解表裏一法矣而太陽入陽明症中復有猪苓湯導熱滋乾一法然汗出多而渴者不可服蓋陽明胃經主津液者也津液充則不渴津液少則渴矣故熱邪傳入陽明必先耗其津液加以汗多而奪之於外復利其小便而奪之於下則

津液有立亡而已故示戒也

十八太陽病寸緩關浮尺弱其人發熱汗出復惡寒不嘔但心下痞者此以醫下之也若其不下者病人不惡寒而渴者此轉屬陽明也小便數者大便必鞭不更衣十日無所苦也渴欲飲水者少少與之但以法救之渴者宜五苓散

原文

寸緩關浮尺弱發熱汗出復惡寒純是太陽未罷之症也設非誤下何得心下痞結耶如不誤下則心下



亦不痞而太陽症必漸傳經乃至不惡寒而渴邪入陽明審矣然陽明津液既偏滲於小便則大腸失其潤而大便之鞭與腸中熱結自是不同所以旬日不更衣亦無苦也以法救之救其津液也與水及用五苓即其法也

五苓利水者也其能止渴而救津液者何也蓋胃中之邪熱既隨小水而滲下則利其小水而邪熱自消矣邪熱消則津回而渴止大便且自行矣正內經通

因通用之法也前段汗出多而渴者不宜用猪苓湯  
重驅津液此段仍有汗仍渴但汗出不至於多而渴  
亦因熱熾其津液方在欲耗未耗之界故與水而用  
五苓為合法也今世之用五苓者但知水穀偏注於  
大腸用之利水而止泄至於津液偏滲於小使用之  
消熱而回津者則罕故詳及之

十九陽明病脈浮而緊者必潮熱發作有時但浮者必

盜汗出

原文

陽明脈之浮緊即太陽寒傷營之脈也單浮即太陽風傷衛之脈也但傳至陽明仲景不欲以營衛辨症而姑變其文耳至於太陽症有未罷各條雖悉尚恐未明再舉潮熱及盜汗陽明之必至者辨之確然無疑矣從前註解皆是斷章取義而不會其大意不知脈緊與潮熱脈浮與盜汗非的對之症也不過藉以辨陽明八九太陽一二之候耳至謂浮為陽盛陽盛則陰虛陰虛則盜汗出節外生枝幾于說夢矣

二十陽明中風脈弦浮大而短氣腹都滿脇下及心痛  
久按之氣不通鼻乾不得汗嗜卧一身及面目悉黃小  
便難有潮熱時時噦耳前後腫刺之小差外不解病過  
十日脈續浮者與小柴胡湯脈但浮無餘症者與麻黃  
湯若不尿腹滿加噦者不治

原文

此條陽明中風之症居七八而中寒之症亦居二三  
觀本文不得汗反用麻黃湯其義自見也然此一症  
為陽明第一重症何以知之太陽症既未罷而少陽

症亦兼見是陽明所主之位前後皆邪而本經之瀰滿流連更不待言矣蓋陽明脈本大兼以少陽之弦太陽之浮則陽明之大正未易衰也腹滿鼻乾嗜卧一身面目悉黃潮熱陽明之症既盡見兼以少陽之脇痛太陽之膀胱不利乃至時時噦耳前後腫則陽明之諸症正未易除也所以病過十日外症不解必審其脈症或可引陽明之邪從少陽出則用小柴胡湯或可引陽明之邪從太陽出則用麻黃湯方合法

若不尿腹滿加噦則真氣垂盡更無力可送其邪故知藥不能治也

二十一陽明病脈遲食難用飽飽則微煩頭眩必小便難此欲作穀瘴雖下之腹滿如故所以然者脈遲故也

原文

脈遲則表症將除似乎可下然得食而微煩仍是外邪助其內熱也熱蒸食而上攻故頭眩小便必難者濕熱土攻水道必不順也欲作穀瘴者水穀之濕得

熱蒸而四迄遍身發黃勢所必至下之腹滿如故病  
既未除其脈之遲者愈益難復故以為戒註謂下之  
則外邪內陷殊不切要蓋腹滿已是邪陷寧俟下之  
始陷耶所以然者脈遲則胃不實徒下其糟粕不惟  
無益而反害之耳然則脈復其常然後膀胱之氣化  
行濕熱自除穀瘴自退又不言可知矣

二十二陽明病若中寒不能食小便不利手足澀然汗  
出此欲作固瘕必大便秘初鞭後溏所以然者以胃中冷

水穀不別故也

原文

註謂固為堅固瘕為積聚大謬蓋大便初鞭後溏因成瘕泄瘕泄即溏泄久而不止則曰固瘕也

二十三陽明病初欲食小便反不利大便自調其人骨節疼翕然如有熱狀奄然發狂澀然汗出而解者此水不勝穀氣與汗共併脈緊則愈

原文

此段文義本明註謂得汗則外邪盡解脈緊且愈全非本文來意觀上二條一以小便少而成穀瘴是濕



熱繇胃上攻胸膈則頭眩而身發黃一以小便不利而成固瘕是濕熱繇胃下滲大腸則手足汗出而成溏泄此條小便反不利本當成穀瘿及瘕泄之症況其人骨節疼濕勝也翕然如有熱狀熱勝也濕熱交勝乃忽然發狂澼然汗出而解者何以得此哉此是胃氣有權能驅陽明之水與熱故水熱不能勝與汗共併而出也脈緊則愈言不遲也脈緊疾則胃氣強盛所以肌肉開而澼然大汗若脈遲則胃中虛冷偏

滲之水不能透而為汗即手足多汗而周身之濕與熱又未能合併而出此胃強能食脈健之人所以得病易愈耶

二十四陽明病不能食以其熱必噦所以然者胃中虛冷故也以其人本虛故攻其熱必噦

原文 攻熱謂寒下之藥也

二十五脈浮而遲表熱裏寒下利清穀者四逆湯主之若胃中虛冷不能食者飲水則噦

原文

表熱裏寒法當先救其裏太陽經中下利不止身疼

痛者已用四逆湯不為過其在陽明之表熱不當牽制更可知矣此病比前一條虛寒更甚故不但攻其熱必噦即飲以水而亦噦矣

前云能食者為中風不能食者為中寒矣此上五條一云食難用飽一云欲食似乎指中風為言一云中寒不能食及後二條之不能食又明指中寒為言所以後人拘執其說而悞為註釋也不知此五條重舉風寒症中之能食不能食辨胃氣之強弱非辨外邪

也故五症中惟水不勝穀氣脈緊則愈一症為胃氣勝其四條俱是脈遲胃冷反為水熱所勝之症夫陽寒之症皆熱症也而其人胃中虛冷者又去可一例而推蓋胃既虛冷則水穀混然無別熱邪傳入必不能遽變為實也胃不實則不可下而熱邪既入轉蒸水穀之氣蘊崇為病即下之而水熱不去徒令胃氣垂絕而作噦耳仲景一一挈出而於後條下利清穀一症主之以四逆湯則前條之較輕者宜主之以溫

胃更不待言惟合五條而總會其立言之意始不至於傳訛耳

門人問澱然汗出而病解乃手足澱然汗出者反作固瘕何手足不宜於汗耶荅曰前代之業鑒者皆極大聰明學問之人故仲景書為中人以上舉一隅能以三隅反者設也胃氣虛寒之人外邪入之必轉增其熱胃熱故膀胱亦熱氣化不行小便因之不利小便不利而盡注於大腸則為洞泄即末條之下利清

穀者是也小便不利乘胃熱而滲於脾則四肢先見  
色黃乃至遍身發黃而成穀瘴者是也今手足澀然  
得汗則脾中之濕熱行而色黃穀瘴之患可免但汗  
從手足而出水熱之氣未得遍泄於週身不過少分  
大腸奔迫之勢故不為洞泄而為痾泄耳無病之人  
小便不行尚漬為他病况傷寒症極赤極熱之小便  
停蓄不行能無此三種之變耶一遡其源而輕重自  
分矣

二十六陽明病但頭眩不惡寒故能食而咳其人必咽

痛若不效者咽不痛

原文

此胃熱協風邪而上攻之症也

二十七陽明病法多汗反無汗其身如蟲行皮中狀者

此以久虛故也

原文

此胃熱協寒邪而鬱於肌膚之症也言久虛者明所以不能透出於肌表之故也非謂當用補也

二十八陽明病反無汗而小便利二三日嘔而效手足

厥者必苦頭痛若不欬不嘔手足不厥者頭不痛

原文

陽明症本不頭痛苦無汗嘔咳手足厥者得之寒因  
而邪熱深也然小便利則邪熱不在內而在外不在  
下而在上故知必苦頭痛也若不欬不嘔不厥而小  
便利者邪熱必順水道而出豈有逆攻巔頂之理哉  
二十九陽明病下之其外有熱手足溫不結胸心中懊  
懷飢不能食但頭汗出者梔子豉湯主之

原文

下之而外有熱心中懊懷飢不能食幾成結胸矣然



手足溫則陽氣未至傷陷不結胸則外邪原屬輕微  
若其人頭汗出者亦是膈中鬱熱上蒸所致宜因其  
高而揚之用梔子豉湯以徹其熱則陽得下通於陰  
而週身灑然汗解并可知矣

此二條皆濕熱上攻之症

三十陽明病口燥但欲漱水不欲嚥此必衄

原文

口中乾燥與渴異漱水不欲嚥知不渴也陽明氣血  
俱多以漱水不欲嚥知邪入血分陽明之脈起於鼻  
故知血得熱而妄行必繇鼻而出也

三十一脈浮發熱口乾鼻燥能食者則衄

原文

脈浮發熱口乾鼻燥陽明邪熱熾矣能食為風邪風性上行所以衄也

三十二陽明病發熱汗出者此為熱越不能發黃也但頭汗出身無汗剋頸而還小便不利渴飲水漿者此為瘀熱在裏身必發黃茵陳蒿湯主之

原文

三十三陽明病面合赤色寒可攻之必發熱色黃小便

不利也

原文

三十四陽明病無汗小便不利心中懊懣者身必發黃

原文

三十五陽明病被火額上微汗出小便不利者必發黃

原文

合四條觀之陽明病濕停熱鬱而煩渴有加勢必發黃然汗出熱從外越則黃可免小便多熱從下泄則黃可免若誤攻之其熱邪愈陷津液愈傷而汗與小便愈不可得矣誤火之則熱邪愈熾津液上奔額雖

微汗而週身之汗與小便愈不可得矣發黃之變安能免乎發黃與前穀瘵本同一症但彼因脈遲胃冷而得則與固瘕及噦同源而與此異派

三十六陽明病下血譫語者此為熱入血室但頭汗出者刺期門隨其熱而瀉之澀然汗出則愈

原文

婦人病傷寒經水適來適斷則邪熱乘之而入于血室譫語如見鬼狀當刺期門乃男子陽明經病下血而譫語者亦為熱入血室亦刺期門

詳後少陽篇末

三十七陽明症其人喜忘者必有畜血所以然者本有  
久瘀血故令喜忘屎雖鞭大便反易其色必黑宜抵當  
湯下之

原文

水陽經熱結膀胱之症輕者如狂重者發狂如狂者  
血自下但用桃核桂枝加入承氣湯因勢利導血去  
則愈發狂者血不下須用抵當湯亟下其血乃愈詳  
太陽上篇此條陽明喜忘之症本差減於如狂乃用  
藥反循發狂之例者何耶蓋太陽少血陽明多血陽

明之血一結則較太陽更為難動所以宜用抵當湯峻攻之法耳但太陽云主之則確乎不易此云宜用則症有輕重不等在于臨時酌量矣

三十八病人無表裏症發熱七八日雖脈浮數者可下之假令已下脈數不解合熱則消穀善飢至六七日不大便者有瘀血也宜抵當湯若脈數不解而下利不止必協熱而便膿血也

原文

雖云無表裏症然發熱則浮數表症尚在也其所以

可下者以七八日為時既久而發熱脈數則胃中熱  
熾津液盡亡勢不得不用下法如大柴胡湯之類是  
也若下後脈數不解可知果胃中熱熾其候當消穀  
善飢然穀食既多則大便必多乃至六七日竟不大  
便其症非氣結而為血結明矣所以亦宜於抵當湯  
也若數不解而下利不止註謂用抵當湯下之數仍  
不解大謬此乃對假令已下脈數不解五句之文見  
已下脈數不解反六七日不大便則宜抵當以下其

血若已下脈數不解而下利不止則不宜抵當之峻  
但當消息以清其血分熱邪若血分之邪不除必協  
熱而便膿血矣

合三條總是熱入血室故隨下血與不下血而異治  
也然要知陽明尚兼太陽則不但胃中熱熾而膀胱  
隨經之熱亦未盡解此所以宜於抵當湯乎

三十九病人煩熱汗出則解又如瘧狀日晡所發熱者  
屬陽明也脈實者宜下之脈浮虛者宜發汗下之與大



承氣湯發汗宜桂枝湯

原文

病人得汗後煩熱解太陽經之邪將盡未盡其人復如瘧狀日晡時發熱則邪入陽明審矣蓋日晡者申酉時乃陽明之王時也發熱即朝熱乃陽明之本候也然雖已入陽明尚恐未離太陽故必重辨其脈脈實者方為正陽陽明宜下之若脈浮虛者仍是陽明而兼太陽更宜汗而不宜下矣發汗宜桂枝湯宜字最妙見前既得汗而煩熱解此番只宜用桂枝和營

衛以盡陽明兼帶之邪斷不可悞用麻黃湯矣

陽明經中篇

凡外邪已離太陽未接少陽  
謂之正陽陽明列於此篇

凡外感之邪全入陽明所轄地界已離太陽未接  
少陽此際當用下法確無疑矣然其邪復有在經  
在府之不同在經者與太少為隣仍是傳經之邪  
在府者則入於胃而不傳經但在經者之用下常  
恐胃有未實篇中無限消息遲徊若在府則胃已  
大實惟有急下以存津液而已

一陽明之為病胃家實是也

原文

以胃家實揭正陽陽明之總見邪到本經遂入胃而成胃實之症也不然陽明病其胃不實者多矣於義安取乎

二傷寒三日陽明脈大

原文

傷寒一日太陽二日陽明三日少陽乃傳經之次第其實不以日拘也此云三日陽明脈大正見二日之陽明傳自太陽必兼乎浮緊浮緩未定是正陽陽明

也若正陽陽明氣血俱多其脈必大而與太陽別矣  
言外見三日症兼少陽則其脈必大而弦又不得為  
正陽陽明也噫微矣哉

三傷寒發熱無汗嘔不能食而反汗出漈漈然者是轉  
屬陽明也

原文

四傷寒轉繫陽明者其人漈漈然微汗出也

原文

漈漈者肌肉開而微汗不乾之貌發熱無汗嘔不能  
食皆傷寒之症也傷寒無汗何以反漈漈汗出耶可

見症已轉屬正陽陽明矣既澣然汗出則熱除嘔止可知矣

五太陽病三日發汗不解蒸蒸發熱者屬胃也調胃承氣湯主之

原文

蒸蒸者熱勢自內騰達於外如蒸炊然胃實之驗也其熱蒸蒸勢必其汗澣澣矣妙哉形容乎惟熱在胃故用承氣以調其胃胃調則病渙然除矣

六陽明病本自汗出醫更重發汗病已差尚微煩不了

了者此大便必鞭故也以亡津液胃中乾燥故令大便鞭當問其小便日幾行若本小便日三四行今日再行故知大便不久出今為小便數少以津液當還入胃中故知不久必大便也

原文

七陽明病自汗出若發汗小便自利者此為津液內竭雖鞭不可攻之當須自欲大便宜蜜煎導而通之若土瓜根及與大猪膽汗皆可為導

原文

八陽明病脈遲雖汗出不惡寒者其身必重短氣腹滿

而喘有潮熱者此外欲解可攻裏也手足濇然而汗出者此大便已鞭也大承氣湯主之若汗多微發熱惡寒者外未解也其熱不潮未可與承氣湯若腹大滿不通者可與小承氣湯微和胃氣勿令大泄下

原文 後半  
節入陽明上

篇

脈遲汗出不惡寒身重短氣腹滿喘潮熱入者乃陽明之外邪欲解可以攻裏而不為大悞之候也然曰欲解曰可攻不過用小承氣及調胃承氣之法耳必

手足澀然汗出方可驗胃實便鞭外邪盡解而當從  
大承氣急下之法也申酉戌間獨熱餘時不熱者為  
潮熱若汗多微發熱惡寒是陽明證尚兼太陽縱腹  
大滿胃終不實只可微和胃氣以從權而已

九病人不大便五六日繞臍痛煩燥發作有時者此有  
燥屎故使不大便也

原文

十天下後六七日不大便煩不解腹滿痛者此有燥屎  
也所以然者本有宿食故也宜大承氣湯

原文



十一病人小便不利大便乍難乍易時有微熱喘胃不能卧者有燥屎也宜大承氣湯

原文

十二陽明病潮熱大便微鞭者可與大承氣湯不鞭者不可與之若不大便六七日恐有燥屎欲知之法少與小承氣湯入腹中轉失氣者此有燥屎乃可攻之若不轉失氣此但初頭鞭後必溏不可攻之攻之必脹滿不能食也欲飲水者與水則噦其後發熱者必大便鞭而少也以小承氣湯和之不轉失氣者慎不可攻也

原文

轉失氣者屁出也腹中之氣得攻藥不為轉動則屬  
虛寒所以悞攻而症變脹滿不能食及噦也攻後重  
復發熱又是胃熱至此方熾大便因可得鞭但為時  
未久必少耳仍以小承氣湯和之若腹中氣仍不轉  
則不但用大承氣大差即用小承氣亦小差矣

十三陽明病下之心中懊懣而煩胃中有燥屎者可攻  
腹微滿初頭鞭後必溏不可攻之若有燥屎者宜大承

氣湯

原文

以小承氣湯試其可下而用大承氣湯下之矣設下後心中懊懣而煩又屬熱重藥輕當再進大承氣以協濟前藥亟驅熱邪則悶煩自解也一云胃中有燥屎者一云若有燥屎者俱指試其轉矢氣及繞臍痛腹滿痛小便不利煩燥時有微熱喘冒不能卧七證言也

十四得病二三日脈弱無太陽柴胡證煩燥心下硬至四五日雖能食以小承氣湯少少與微和之令小安至

六日與承氣湯一升若不大便六七日小便少者雖不能食但初頭硬後必溏未定成硬攻之必溏須小便利尿定硬乃可攻之宜大承氣湯

原文

無太陽少陽之證則煩燥心下硬屬正陽陽明之可下無疑矣乃其人脈弱雖是能食亦止可少用小承氣微和胃氣和之而當必覺小安俟隔日再以小承氣稍稍多進總因脈弱故爾遲徊也至六七日竟不大便似乎胃實乃小便復少正恐胃弱而膀胱氣化

之源室轉滲大腸初硬後溏耳所以小便利屎定硬  
乃可攻之

此段之雖能食雖不能食全與辨風寒無涉另有二  
義見雖能食者不可以為胃強而輕下也雖不能食  
者不可以為胃中有燥屎而輕下也後九條云譫語  
有潮熱反不能食者胃中必有燥屎五六枚與此五  
發前後註釋俱差

十五陽明病不吐不下心煩者可與調胃承氣湯

原文

胃氣及津液既不繇吐下而傷則心煩明係胃中熱  
熾故可與調胃承氣以安胃氣而全津液也

合九條總是以外證之解與不解氣之轉與不轉臍  
腹之痛與不痛脈之弱與不弱汗出之多與不多小  
便之利與不利邪熱之熾與不熾津液之乾與不乾  
而辨腹中之燥屎多與不多溏與不溏以消息微下  
之法故惟手足濇然汗出大便已硬者主之以大承  
氣湯其他諸證一則曰宜用導法再則曰不可攻

之再則曰宜小承氣湯再則曰少與小承氣湯再則  
曰明日更與一升再則曰宜大承氣湯全是商量治  
法聽人臨時斟酌以祈無悞所以不用主之二字此  
等處關係安危最大蓋熱邪入胃不以寒藥治之則  
胃傷然寒藥本以救胃也不及則藥不勝邪太過則  
藥反傷正況乎不勝其邪勢必盡傷其正徒傷其正  
又未必盡去其邪此仲景所為諄復於二者之間耶  
十六陽明病譫語發潮熱脈滑而疾者小承氣湯主之

因與承氣湯一升腹中轉失氣者更服一升若不轉失氣勿更與之明日不大便脈反微澀者裏虛也為難治不可更與承氣湯也

原文

譏語而發潮熱陽明之下證審矣更兼其脈滑疾復與脈弱者不倫故主之以小承氣湯一定之法也然尚未知其裏證若何必轉失氣方可再服若服後不轉失氣并不大便脈反微而且澀又是裏氣虛寒之證蓋陽明居於中土其表虛表實來自太陽至此已



明其裏虛裏實茫然未卜故用法不可令虛者益虛有如此之鄭重也

十七夫實則譟語虛則鄭聲鄭聲重語也

原文

鄭聲者鄭重之聲正氣不足聲出重濁也亦辨裏實裏虛之一端也

十八直視譟語喘滿者死下利者亦死

原文

此條當會意讀謂譟語之人直視者死喘滿者死下利者死其義始明蓋譟語者心火亢極也加以直視

則腎水垂絕心火愈無制故主死也喘滿者邪聚陽位而上爭正不勝邪氣從上脫故主死也下利者邪聚陰位而下奪正不勝邪氣從下脫故主死也

十九發汗多若重發汗者亡其陽譫語脈短者死脈自和者不死

原文

註擬此為太陽經脫簡不知太陽經無譫語之例必久而兼陽明少陽方有譫語故此言太陽經得病時發汗過多及傳陽明時重發其汗亡陽而譫語之

一證也亡陽之人所存者陰氣耳故神魂無主而妄見妄聞與熱邪乘心之候不同況汗多則大邪必從汗解止慮陽神飛越難返故脈短則陰陽不附脈和則陰陽未離其生死但從脈定耳其脈既短安問藥之長哉

門人問亡陽而譫語四逆湯可用乎荅曰仲景不言方而子欲言之曷不詳之仲景耶蓋亡陽固必急回其陽然邪傳陽明胃熱之熾否津液之竭否裏證之

實否俱不可知設不辨悉欲回其陽先竭其陰竟何益哉此仲景不言藥乃其所以聖也然得子此問而仲景之妙義愈彰矣

二十陽明病其人多汗以津液外出胃中燥大便必鞭鞭則譫語小承氣湯主之若一服譫語止更莫復服

原文

此條舉譫語之因汗多津越者為言

二十一傷寒四五日脈沈而喘滿沈為在裏而反發其汗津液越出大便為難表虛裏實久則譫語

原文

此舉讖語因悞汗而致者其曰裏實亦即上文胃中燥大便必鞭之互辭其不出方者亦即上文小承氣湯之互意也

二十二傷寒若吐若下後不解不大便五六日上至十餘日日晡所發潮熱不惡寒獨語如見鬼狀若劇者發則不識人循衣摸床惕而不安微喘直視脈弦者生澀者死微者但發熱讖語者大承氣湯主之若一服利止後服

原文

此條舉譏語之勢重者為言而勢重之中復分二等  
劇者生死仍憑乎脈微者則主以大承氣湯比上條  
之小承氣為更進矣前云譏語脈短者死此云脈弦  
者生前云譏語脈滑疾者用小承氣此云脈澀者死  
更互一字而大意躍然

三十三汗出譏語者以有燥屎在胃中此為風也須下  
之過經乃可下之下之若早語言必亂以表虛裏實故  
也下之則愈宜大承氣湯

原文

此條之文似淺而實深仲景懼人不解已自為註脚  
不識後人何故茫然胃有燥屎本當用下以譟語而  
兼汗出知其風邪在胸必俟過經下之始不增擾所  
以然者風性善行數變下之若早徒引之走空竅亂  
神明耳然胃有燥屎下之不為大悞其小悞止在未  
辨證兼乎風若此者必再一大下庶大腸空而風邪  
得以併出故自愈此通因通用之法亦將差就錯之  
法也

二十四陽明病讞語有潮熱反不能食者胃中必有燥屎五六枚也若能食者但鞭耳宜大承氣湯

原文

有燥屎則腸胃熱結故不能食若能食則腸胃未結故但鞭耳前條云其後發熱者必大便秘而少也此云但鞭耳不更言其少乃於胃中有燥屎者言其五六枚之多亦互舉以辨微細之意不可忽也俱宜大承氣湯者已結者開其結未結者滌其熱不令更結同一讞語潮熱故同一治至於藥制之大小必有分



矣

合九條觀之既云實則譏語矣乃其用治遲徊審諦  
始以和法為攻法俟服藥後重辨脈證不敢徑情急  
攻即攻之又一服利止後服何其鄭重耶可見所謂  
實者乃邪氣實也邪氣實正氣未有不虛況津液為  
邪所耗而至於譏語方寸幾于無主其虛為何如哉  
邪實不可不下正虛不可太下斟酌於邪正之間以  
權宜而善其治良工苦心要當三復於聖言矣

二十五陽明病發熱汗多者急下之宜大承氣湯

原文

胃中止一津液汗多則津液外滲加以發熱則津液盡隨熱勢蒸蒸騰達於外更無他法可止其汗惟有急下一法引熱勢從大腸而出庶津液不致盡越於外耳前條云發汗不解蒸蒸發熱者屬胃也調胃承氣湯主之可見調胃之義乃和緩其胃中之熱以存津液也此證發熱而至於汗多明是始先未行調胃所致故宜急下無取緩調

二十六發汗不解腹滿痛者急下之宜大承氣湯主之

腹滿不減減不足言當下之宜大承氣湯

原文

發汗不解而反腹中滿痛則邪不在表而在裏亦惟有急下一法庶滿痛去而病自解也減不足言四字形容腹滿如繪見滿至十分即減去一二分不足殺其勢也此所以縱有外邪未解而當下無疑耳

二十七傷寒六七日目中不了了睛不和無表裏證大便難身微熱者此為實也急下之宜大承氣湯

原文

此一條辨證最微細大便難則非久祕裏證不急也  
身微熱則非大熱表證不急也故曰無表裏證只可  
因是而驗其熱邪在中耳熱邪在中亦不為急但其  
人目中不了了睛不和則急矣以陽明之脈絡於目  
絡中之邪且盛則在經之盛更可知故惟有急下之  
而已

按少陰經有急下三法以救腎水一本經水竭一本  
邪涌水一土邪凌水而陽明經亦有急下三法以救

津液一汗多津越於外一腹滿津結於內一目睛不  
慧津枯於中合兩經下法以觀病情生理恍覺身在  
冰壺腹飲上池矣

二十九陽明病欲解時從申至戌上

原文

三十脈浮而芤浮為陽芤為陰浮芤相搏胃氣生熱其

陽則絕

原文

其陽則絕即無陽之互辭謂津液內亡也當下不下  
故至此耳

三十一跌傷脈浮而濡浮則胃氣強濡則小便數浮濡相搏大便則難其脾為約麻仁丸主之

脾約之證在太陽陽明已當用麻仁丸潤下失此不用延至正陽陽明胃中津液甕乾杯罄下無及矣然則浮濡之脈轉為浮芤不可類推乎詳見本卷末答門人脾約問

陽明經下篇

凡外邪已趨少陽未離陽明謂之少陽陽明列於此篇

凡屬正陽陽明之證病已入於胃腑故下之則愈

其有胃不實而下證不具者病仍在經在經之邪  
不解必隨經而傳少陽口苦咽乾目眩耳聾胸脇  
滿痛之證必兼見一二故謂之少陽陽明其實乃  
是陽明少陽也

少陽主半表半裏陽明證中纔兼少陽即表裏皆  
不可攻故例中止用和法

少陽陽明合病另有  
顓條附三陽經後

一陽明病發潮熱大便溏小便自可胸脇滿不去者小

柴胡湯主之

原文

潮熱本陽明胃實之候若大便溏小便自可則胃全  
不實更加胸脇滿不去則證已傳入少陽矣纔兼少  
陽即有汗下二禁惟小柴胡一方合表裏中而總和  
之乃少陽一經之正法故陽明少陽亦取用之無別  
法也

二陽明病脇下鞭滿不大便而嘔舌上白胎者可與小  
柴胡湯上焦得通津液得下胃氣因和身濇然而汗出



解也

原文

不但大便溏為胃未實即使不大便而見脇下鞭滿  
嘔與舌胎之證則少陽為多亦當從小柴胡湯分解  
陰陽則上下通和泚然汗出而胎嘔脇滿之外證一  
時俱解矣既云津液得下則大便自行亦可知矣此  
一和而表裏俱徹所以為貴也

上焦得通津液得下八字關係病機最切風寒之邪  
協津液而上聚于膈中為喘為嘔為水逆為結胸嘗

十居六七是風寒不解則津液必不得下倘誤行發散不惟津液不下且轉增上逆之勢愈無退息之期矣此所以和之於中而上焦反通也至於雜病項中如痰火哮喘咳嗽癰癰等症又皆火勢薰蒸日久頑痰膠結經隧所以火不內熄則津液必不能下灌靈根而清華盡化為敗濁耳夫人之得以長享者惟賴後天水穀之氣生此津液津液結則病津液竭則死矣故治病而不知救人之津液者真庸工也

論太陽陽明少陽陽明原有可下之證

三問曰病有太陽陽明有正陽陽明有少陽陽明何謂也答曰太陽陽明者脾約是也正陽陽明者胃家實是也少陽陽明者發汗利小便已胃中燥煩實大便難是也原文

註謂脾約乃太陽之邪徑趨入胃而成胃實貽悞千古詳後答門人問脾約論

附少陽轉陽明二證

此與陽明兼帶少陽之症迥殊故另揭出

少陽陽明者發汗利小便已胃中燥煩實大便難是也

陽明原文

病已傳少陽經而去陽明經遠矣乃從少陽經治法發汗利小便已其人方纔胃中燥煩實大便難者是少陽重轉陽明而成可下之一證也

服柴胡湯已渴者屬陽明也以法治之

少陽原文  
此條亦互上

上條之意  
解見少陽

附太陰轉陽明一證

傷寒脈浮而緩手足自溫者是為繫在太陰太陰者身當發黃若小便利者不能發黃至七八日大便硬者陽明病也

太陰原文

脈浮而緩本為表證然無發熱惡寒外候而手足自溫者是邪已去表而入裏其脈之浮緩又是邪在太陰以脾脈主緩故也邪入太陰勢必蒸濕為黃若小便自利則濕行而發黃之患可免但脾濕既行胃益乾燥胃燥則大便必硬因復轉為陽明內實而成可

下之證也

附少陰轉陽明一證

少陰病六七日腹脹不大便者急下之宜大承氣湯

少陰原文

少陰之證自利者最多虛寒則下利清穀滑脫則下利膿血故多用溫法此以六七日不大便而腹脹可見熱邪轉歸陽明而為胃實之證所以宜於急下也  
附厥陰轉陽明之證

下利譏語者有燥屎也宜小承氣湯

厥陰原文

下利則熱不結胃不實何得譏語耶此必邪返於胃  
內有燥屎故雖下利而結者自若也半利半結所以  
不宜大承氣而宜於小承氣微動其結耳

附答客難大意

客有熟仲景之書者難昌曰所分陽明三篇將仲景  
陽明證中七十四條收盡無遺大開後人眼目可謂  
智矣祇是過矜其智而掩昔賢之長鄙見微有不滿

耳昌曰余何敢哉客曰王叔和當日編次陽明一經  
首列問有太陽陽明有正陽陽明有少陽陽明者何  
也仲景答曰太陽陽明者脾約是也正陽陽明者胃  
家實是也少陽陽明者發汗利小便已胃中燥大便  
難是也聖言煌煌子既遵其例何反後其文耶昌曰  
三段揭首叔和已悞曷可再悞昌分三篇不從茲起  
見也三篇舉以統括七十餘條之義若叔和所列不  
過是絕無僅有之一證以冠篇首則陽明一經之大



旨盡失此無難辨者蓋當日之問乃問三陽經中可下之證所以答云太陽陽明之可下者除是脾約少陽陽明之可下者除是發汗利小便已胃中燥大便難舍此二證則太陽少陽必無一定之下法矣今分三篇以明太少二陽之不可下乃以可下之條混引其端昌之所不敢出也又況少陽陽明所謂發汗利小便已胃中燥大便難者乃是病邪已去陽明全入少陽及發汗利小便後少陽症亦盡罷其邪不入三

陰重復轉到陽明所以名為少陽陽明與始先病在陽明畧兼少陽一二者有何干涉哉客始為之心折附答門人奇問

門人問治傷寒之法軌則雖多必有精一之理可以貫徹終始者請吾師試舉一言以蔽之可乎余曰傷寒之變千蹊萬徑如之何其可以一言括耶門人曰如痘疹秘訣謂起先開盤時要有根脚有根脚則漿成及至灌膿時要無根脚無根脚則毒化此亦片言

居要者吾師曷不做而言之余笑曰若是則姑擬一言以答子之奇問亦無難者凡治傷寒之訣起先惟恐傳經傳經則變生其後惟恐不傳經不傳經則勢篤此二語不識可括其義否門人躊躇曰起先惟恐傳經遑矣其後惟恐不傳經之說太奇且太創未之前聞也余曰仲景言之再四但子輩雙眸未炯見同未見耳何奇創之有耶仲景云陽明居中土也萬物所歸無所復傳蓋陽明之脈行身之前邪入其經則

有前經後經相傳之次第而陽明之府乃中州之胃  
為水穀之海臟腑經脈之總司邪入其中則無復傳  
次之可言所以惟有下奪一法奪其土而邪自不留  
耳此仲景於陽明經內特挈不傳之妙理也又云陽  
明中風脈弦浮大而短氣腹都滿脇下及心痛久按  
之氣不通鼻乾不得汗嗜卧一身及面目悉黃小便  
難有潮熱時時噦耳前後腫刺之小差外不解過經  
十日脈續浮者與小柴胡湯脈但浮無餘證者與麻

黃湯若不尿腹滿加噦者不治此一段至理千古無人看出總不識其所言者何事詎知脈弦浮大而氣反短連腹都滿者邪不傳也脇下及心痛乃至久按之氣不通者邪不傳也鼻乾不得汗嗜卧表裏俱困乃至一身及面目悉蒸為黃者邪不傳也小便難有潮熱時時噦者胃熱熾盛上下道窮邪不傳也耳前後腫刺之小差者內邪不傳乃至外挾其血亦不散但其腫小差也外不解過經十日留連極矣所謂萬

物所歸無所復傳者原為美事孰知病邪歸之而不傳反成如此之危候耶要知陽明之邪來自太陽去自少陽所以脈續浮者與小柴胡湯推其邪使速往少陽去路也脈但浮無餘症者與麻黃湯推其邪使速還太陽來路也若不尿腹滿則胃邪內壅不下行矣而更加噦則胃氣將竭愈上逆矣再有何法可以驅其邪而使之傳哉又云太陽病十日已去脈浮細而嗜卧者外已解也設胸滿脇痛者與小柴胡湯脈

但浮者與麻黃湯見脈浮細而嗜卧邪已盡傳於外而解散者方可無慮設胸滿脇痛則當與小柴胡湯推之速往少陽而出設脈但浮無餘症則當與麻黃湯推之速往太陽而出是皆惟恐其邪之不傳暗伏危機也必識此意然後始識仲景用藥之故不然豈有十餘日後而無故張皇反用麻黃湯之理哉凡此皆因太少二陽與陽明連貫故用表法所謂從外入者驅而出之于外也復有表裏陰陽之間正已虛而

邪不盡無可速傳之候仲景用法悉從外邪不能傳出起見如太陽病未解脈陰陽俱停必先振慄汗出而解設不振慄則邪不能傳之於表而無從得汗可知也然既云陰陽兩停其傳表傳裏未可預定所以惟陽脈微者方是邪不能傳表當從汗之而解惟陰脈微者方是邪不能傳裏當從下之而解此其故甚可思也若非邪住不傳之候則陽脈微者當補其陽陰脈微者當補其陰矣豈有反汗之而傷其陽下之



而傷其陰之理哉又如太陽病過經十餘日及二三下之後四五日柴胡症仍在者先與小柴胡湯服之本當蒸蒸而振却發熱汗出而解矣乃反加嘔不止心下急鬱鬱微煩者此邪因屢下而入裏已深非一柴胡湯可以盡提之傳出于表必再與大柴胡湯分提表裏之邪陽邪傳陽陰邪傳陰一舉而分解之始為合法不然豈有嘔急鬱煩表症轉增反行兼解其裏之理哉又如傷寒五六日頭汗出微惡寒手足冷

心下滿口不飲食大便鞭脈細者此為陽微結乃是說陽分之邪微微結聚不能傳出於表裏故本文即繼之曰必有表復有裏也其旨甚明也末云可與小柴胡湯設不了了者得屎而解即前證過經十餘日用大小柴胡分提使傳之法也迺知舍此更無可使其傳矣又如發汗吐下後虛煩不得眠若劇者必反覆顛倒心中懊懣此邪退正虛而餘邪阻滯不能傳散以致無可奈何也此時將汗之乎下之乎和之乎

溫之乎仲景巧用梔子豉湯湧載其餘邪於上俾一吐而盡傳無餘設非此一法從高而越有殆而已矣又如云食穀則噦不能食攻其熱則噦欲飲水者與水則噦不能食者與水則噦何其言之不一耶皆是為胃氣虛寒餘邪不能傳散者致其叮嚀也更有穀痺一證邪熱在胃不能傳出反蒸食而發黃固瘕一證胃氣虛寒水停不行反滲大腸而瘕泄此三證者仲景但言證而不言治學者倘不透此一關果何從

而施治耶是則邪之傳與不傳所關如此甚鉅乃治傷寒家初不量邪勢之淺深胃氣之厚薄而貿貿以從事也實繇先聖法則未經昔賢闡繹後學漫無入路耳夫足太陽膀胱足陽明胃足少陽膽皆府也何必獨歸陽明始不傳耶蓋膀胱主出胃主納膽不主出納所以惟陽明胃為藏納之地具載物之體傳經之邪必歸陽明始能消之若夫胃土告困不能消邪則在府之邪漫無出路久之必漸漬於本經其脈必

仍轉為浮所以仲景云脈續浮者與柴胡湯此中復有奧義其義維何即必有表復有裏之說也故用柴胡湯提出少陽俾循經次而傳太陰少陰厥陰以盡其邪乃始得以無患耳若但浮無餘證則是有表無裏只用麻黃湯提出太陽其邪立解不勞餘力矣得仲景之神者目擊道存即如天以四時成歲中土各旺于季月之末然後木底其根火收其焰金銷其肅水藏其瀾使非傳之中土則木火金水不相連貫何

以化機盈眸不息乎人之飲食入胃清氣升而濁氣降渣滓不留者其妙惟在於傳設一日不傳則積滯而不能化矣至於仙家攢簇五行東三南二木火相戀歸于中土西四北一金水相親歸于中土其妙更在于不傳設傳則流散而不能造矣然則中土之傳與不傳足盡天人之蘊又何疑于醫事哉門人爽然曰似此剔出傷寒神髓以立言數之可千推之可萬恍疑身陟天漢星津炯炯光芒流射肺腑矣請名之

曰伐髓迪光論

門人問脾約一症胃强脾弱脾不為胃行其津液如  
懦夫受其悍妻之約束寧不為家之索乎余曰何以  
見之曰仲景云趺陽脈浮而澀浮則胃氣强澀則小  
便數浮澀相搏大便為難其脾為約麻仁丸主之以  
是知胃强脾弱也余曰脾弱即當補矣何為麻仁丸  
中反用大黃枳實厚朴乎子輩日聆師說而腹笥從  
前相仍之陋甚非所望也仲景說胃强原未說脾弱

況其所謂胃强者正是因脾之強而強蓋約者省約也脾氣過強將三五日胃中所受之穀省約為一二彈丸而出全是脾土過燥致令腸胃中之津液日漸乾枯所以大便為難也設脾氣弱即當便泄矣豈有反難之理乎相傳謂脾弱不能約束胃中之水何以反能約束胃中之穀耶在陽明例中凡宜攻下者惟恐邪未入胃大便弗鞭又恐初鞭後溏不可妄攻若欲攻之先與小承氣試其轉失氣方可攻皆是慮夫



脾氣之弱故爾躊躇也若夫脾約之症在太陽已即當下矣更何待陽明耶子輩傳會前人以脾約為脾弱將指吳起之殺妻者為懦夫乎有悖聖言矣

門人又問曰今乃知脾約之解矣觸類而推太陽陽明之脾約與少陽陽明之胃中燥煩實大便難者同是一症此其所以俱可攻下耶余曰是未可言觸類也因難之曰邪熱自太陽而陽明而少陽為日既久爍其津液大便固當難矣其在太陽方病之始邪未

入胃何得津液即便消耗而大腸燥結耶且太陽表邪未盡又何不俟傳經即亟亟潤下而自犯太陽之禁耶門人不能對因誨之曰脾約一症乃是未病外感之先其人素慣脾約三五日一次大便秘者乃至感受風寒即邪未入胃而胃已先實所以邪至陽明不患胃之不實但患無津液以奉其邪立至枯槁耳仲景大變太陽禁下之例而另立麻仁丸一法以潤下之不比一時暫結者可用湯藥蕩滌之耳此義從前

賸賸凡遇素成脾約之人亦必俟經盡方下百無一生矣故因子問而暢發之

附問難門人大意

暇日門人聚譚仲景製方之妙主伯亞旅天然一定因問曰仲景於太陽經中有兼帶陽明經者其風傷衛則桂枝湯中加葛根其寒傷營則麻黃湯中加葛根有兼帶少陽經者其風傷衛則桂枝湯中加柴胡其寒傷營則麻黃湯中加柴胡合併之病亦然是則

陽明經以葛根為主藥少陽經以柴胡為主藥矣乃少陽經顓用小柴胡湯而陽明一經全不用葛根湯者何耶門人不能對因誨之曰此有二義太陽而畧兼陽明則以方來之陽明為重故加葛根陽明而尚兼太陽則以未罷之太陽為重故不用葛根且陽明主肌肉者也而用葛根太開其肌肉則津液盡從外泄恐胃愈燥而陰立亡故不用者所以存津液耳本經前條有云陽脈實因發其汗出多者亦為太過太

過為陽絕于裏亡津液大便因鞭也是陽脈實者且不可過汗其陽脈微者又當何如耶仲景所以陽明諸症全不用葛根之意益彰彰矣小兒佈痘見點之時第一戒用葛根用之則肌竅盡開一齊擁出昔賢云見點之後忌用升麻湯以升麻湯中有葛根耳後人誤謂見點後忌用升麻至于葛根反忍用無忌只遺一湯字而葛根等免脫升麻等雉罹兒命遭枉等恒河沙數矣因與治傷寒濫用葛根劫人津液者並

舉示戒焉

尚論篇卷二

欽定四庫全書

尚論篇卷三

新建 喻昌 撰

尚論少陽經證治大意

仲景少陽經之原文叔和大半編入太陽經中昌殊不得其解豈以太陽行身之背少陽行身之側其營衛顯然易辨非如陽明與三陰之屬腑臟者營衛難窺故將少陽之文彙入太陽耶此等處竊

不敢仍叔和之舊蓋六經各有專司乃引少陽之  
文與三陽合病併病過經不解及壞病諸條悉入  
太陽篇中適足以亂太陽之正也在太陽一經之  
病已倍他經辨之倍難而無端蔓引混収此後人  
所爲多岐亡羊乎茲將治少陽之法悉歸本篇其  
合病併病壞病痰病另隸于三陽經後庶太陽之  
脉清而少陽之脉亦清耳

少陽證用小柴胡湯和解加減一法



一傷寒五六日中風往來寒熱胸脇苦滿默默不欲飲食心煩喜嘔或胸中煩而不嘔或渴或腹中痛或脇下痞鞭或心下悸小便不利或不渴身有微熱或欬者小柴胡湯主之傷寒中風有柴胡證但見一證便是不必悉具若胸中煩而不嘔去半夏人參加枳實若渴者去半夏加人參栝蒌根若腹中痛去黃芩加芍藥若脇下痞鞭去大棗加牡蠣若心下悸小便不利者去黃芩加茯苓若不渴外有微熱者去人參加桂枝溫覆取微

似汗愈若欬者去人參大棗生薑加五味子乾薑

原文

軀殼之表陽也軀殼之裏陰也少陽主半表半裏之間其邪入而併於陰則寒出而併於陽則熱往來寒熱無常期也風寒之外邪挾身中有形之痰飲結聚于少陽之本位所以胸脇苦滿也胸脇旣滿胃中之水穀亦不消所以默默不欲食卽昏昏之意非靜默也心煩者邪在胸脇逼處心間也或嘔不嘔或渴不渴諸多見證各隨人之氣體不盡同也然總以小柴

胡之和法爲主治而各隨見證以加減之耳

少陽病有辨證一法

二少陽之爲病口苦咽乾目眩也

原文

口苦咽乾者熱聚於膽也目眩者木盛生風而旋暈也

少陽病有汗吐下三禁二法

三傷寒脉弦細頭痛發熱者屬少陽少陽不可發汗發汗則譫語此屬胃胃和則愈胃不和則煩而悸

原文

少陽傷寒禁發汗少陽中風禁吐下二義互舉其旨益嚴蓋傷寒之頭痛發熱宜於發汗者尚不可汗則傷風之不可汗更不待言矣傷風之胸滿而煩痰飲上逆似可吐下者尚不可吐下則傷寒之不可吐下更不待言矣

脉弦細者邪欲入裏其在胃之津液必爲熱耗重復發汗而驅其津液外出安得不譟語乎胃和者邪散而津回也不和者津枯而飲結所以煩而悸也

四少陽中風兩耳無所聞目赤胸中滿而煩者不可吐

下吐下則悸而驚

原文

風熱上壅則耳無聞目赤無形風熱與有質痰飲搏結則胸滿而煩此但從和解中行分利法可也若誤汗下則胸中正氣大傷而邪得以逼亂神明此時卽爲城下之盟所喪不滋多乎

辨少陽經病有欲解不解四法

五傷寒三日三陽爲盡三陰當受邪其人反能食不嘔

此爲三陰不受邪也

原文

能食不嘔與胃和則愈之義互發

六傷寒三日少陽脉小者欲已也

原文

脉不弦大邪微欲解之先徵也

七少陽病欲解時從寅至辰上

原文

受病之經正氣虛衰每藉力於時令之王此趨三避  
五所繇來乎

八傷寒六七日無大熱其人燥煩者此爲陽去入陰故

也  
原文

陽去入陰則邪勢得以留連轉致危困者多矣有治傷寒之責者線索在手於邪在陽經之日亟從外奪不亦善乎

少陽證具將欲入裏而太陽陽明小有未罷但用小柴胡湯一法

九傷寒四五日身熱惡風頭項強脇下滿手足溫而渴者小柴胡湯主之  
原文

身熱惡風太陽證也頭項強太陽兼陽明證也脇下滿少陽證也本當從三陽合併病之例而用表法但其手足溫而加渴外邪輻湊於少陽而向裏之機已著倘更用辛甘發散之法是重增其熱而大耗其津也故從小柴胡之和法則陽邪自罷而陰津不傷一舉而兩得矣此用小柴胡湯當從加減法不嘔而渴者去半夏加枯蘆根爲是

少陽證脉弦澁加腹痛先用建中後用小柴胡一法



十傷寒陽脉澀陰脉弦法當腹中急痛者先用小建中

湯不差者與小柴胡湯主之

原文

陽脉濇陰脉弦渾似在裏之陰寒所以法當腹中急痛故以小建中之緩而和其急腹痛止而脉不弦澀矣若不差則弦爲少陽之本脉而澀乃汗出不徹腹痛乃邪欲傳太陰也則用小柴胡以和陰陽爲的當無疑矣

少陽證具已經汗下而太陽未罷胸有微結者宜用

柴胡桂枝乾薑湯一法

十一傷寒五六日已發汗而復下之胸脇滿微結小便不利渴而不嘔但頭汗出往來寒熱心煩者此爲未解也柴胡桂枝乾薑湯主之

原文

少陽證尚兼太陽所以誤下而胸間微結也太陽中篇結胸條內頭微汗出用大陷胸湯以其熱結在裏故從下奪之法也此頭汗出而胸微結用柴胡桂枝乾薑湯以裏證未具故從和解之法也小柴胡方中

減半夏人參而加桂枝以行太陽加乾薑以散滿枯  
薑根以滋乾牡蠣以軟結一一皆從本例也

少陽證服小柴胡湯加渴者宜救津液一法

十二服柴胡湯已渴者屬陽明也以法治之

原文

風寒之邪從陽明而轉少陽起先不渴裏證未具及  
服小柴胡湯已重加口渴則邪還陽明而當調胃以  
存津液矣然不曰攻下而曰以法治之意味無窮蓋  
少陽之寒熱往來間有渴證倘少陽未罷而恣言攻

下不自犯少陽之禁乎故見少陽重轉陽明之證但云以法治之其法維何卽發汗利小便已胃中燥煩實大便秘難之說也若未利其小便則有猪苓五苓之法若津乾熱熾又有人參白虎之法仲景圓機活潑人存政舉未易言矣

少陽證具悞下而證尚未變者仍用小柴胡湯二法十三凡柴胡湯病證而下之若柴胡證不罷者復與柴胡湯必蒸蒸而振却發熱汗出而解

原文

十四傷寒五六日嘔而發熱者柴胡湯證具而以他藥下之柴胡證仍在者復與柴胡湯此雖已下之不爲逆必蒸蒸而振却發熱汗出而解若心下滿而鞭痛者此爲結胸也大陷胸湯主之但滿而不痛者此爲痞柴胡湯不中與之宜半夏瀉心湯

原文

二條互發前畧後詳悞下雖證未變然正氣先虛故服柴胡湯必蒸蒸而振始得發熱汗出而邪從表解也若悞下而成結胸與痞則邪尚在太陽而柴胡非

所宜矣結胸及痞太陽經各有專條

重以汗下爲逆不爲逆申上文而廣其義

十五本發汗而復下之此爲逆也若先發汗治不爲逆  
本先下之而反汗之此爲逆也若先下之治不爲逆也

原文

少陽雖有汗下二禁然而當汗當下正自不同本當  
發汗而反下之則爲逆若先汗後下則不爲逆本當  
下之而反發汗則爲逆若先下後汗則不爲逆全在

辨其表裏差多差少之間矣

少陽病有疑似少陰者當細辨脉證用藥一法

十六傷寒五六日頭汗出微惡寒手足冷心下滿口不欲食大便鞕脉細者此爲陽微結必有表復有裏也脉沉亦在裏也汗出爲陽微假令純陰結不得復有外證悉入在裏此爲半在裏半在外也脉雖沉緊不得爲少陰病所以然者陰不得有汗今頭汗出故知非少陰也可與小柴胡湯設不了了者得屎而解

陽微結者陽邪微結未盡散也註作陽氣衰微故邪氣結聚大差果爾則頭汗出爲亡陽之證非半表半裏之證矣果爾則陰結又是陰氣衰微矣玩本文假令純陰結等語謂陽邪若不微結純是陰邪內結則不得復有外證其義甚明得屎而解卽取大柴胡爲和法之意也

用汗吐下後有辨脉證而識其必愈一法

十七凡病若發汗若吐若下若亡津液陰陽自和者必



自愈

原文

汗吐下三法難於恰當若悞用之則病未去而胃中之津液已先亡凡見此者診視其脉與證陰陽自和則津液復生必自愈也

辨婦人傷寒傳少陽有熱入血室之證四法

十八婦人中風發熱惡寒經水適來得之七八日熱除而脉遲身涼胸脇下滿如結胸狀譟語者此爲熱入血室也當刺期門隨其實而瀉之

原文

十九婦人中風七八日續得寒熱發作有時經水適斷者此爲熱入血室其血必結故使如瘧狀發作有時小

柴胡湯主之

原文

二十婦人傷寒發熱經水適來晝日明了暮則譫語如見鬼狀者此爲熱入血室無犯胃氣及上二焦必自愈

原文

二十一血弱氣盡腠理開邪氣因入與正氣相搏結於脇下正邪分爭往來寒熱休作有時默默不欲飲食臟

腑相連其痛必下邪高痛下故使嘔也小柴胡湯主之

原文

四條皆互文見意也一云經水適來一云經水適斷  
一云七八日熱除而脉遲身涼一云七八日續得寒  
熱發作有時一云胸脇下滿一云邪氣因入與正氣  
相搏結於脇下一云如結胸狀一云邪高痛下一云  
譫語一云晝日明了暮則譫語如見鬼狀一云如瘧  
狀一云往來寒熱休作有時一云刺期門一云用小

柴胡湯一云毋犯胃氣及上二焦皆互文以明大義而自爲註脚也學者試因此而紬繹全書思過半矣又如結胸狀四字仲景尚恐形容不盡重以臟腑相連邪高痛下之語暢發病情蓋血室者衝脉也下居腹內厥陰肝之所主也而少陽之膽與肝相連腑邪在上臟邪在下胃口逼處二邪之界所以默默不欲飲食而但喜嘔耳期門者肝之募也隨其實而瀉之瀉肝之實也又刺期門之註脚也小柴胡湯治少陽

之正法也毋犯胃氣及上二焦則舍期門小柴胡更  
無他法矣必自愈見腑邪可用小柴胡湯而臟邪必  
俟經水再行其邪熱乃隨血去又非藥之所能勝耳  
少陽止此

重編合病併病壞病痰病附三陽經後其過經不解  
附三陰經後

右症叔和俱編入太陽經中不知何意或謂傷寒  
只分六經舍太陽一經別無可入諸項也然則霍

亂證及陰陽易等證曷不盡入太陽耶况乎既重  
六經則少陽亦六經之一曷爲不重耶茲一一清  
出以六經等六國以合併諸病等附庸俾業傷寒  
者一展玩而了然於心目耳

合病

合病者兩經之證各見一半如日月之合朔如王者  
之合圭璧界限中分不偏多偏少之謂也

一太陽病項背強几几反汗出惡風者桂枝加葛根湯

主之 原文

二太陽病項背強几几無汗惡風者葛根湯主之 原文

二條以有汗無汗定傷風傷寒之別蓋太陽初交陽明未至兩經各半故仲景原文不用合病二字然雖不名合病其實乃合病之初證也几几者頸不舒也頸屬陽明既於太陽風傷衛證中纔見陽明一證卽於桂枝湯內加葛根一藥太陽寒傷營證中纔見陽明一證卽於麻黃湯內加葛根一藥此大匠天然不

易之穀率也然第二條不用麻黃全方加葛根反用  
桂枝全方加麻黃葛根者則并其巧而傳之矣見寒  
邪既欲傳於陽明則胸間之喘必自止自可不用杏  
仁况頸項背俱是陽位易於得汗之處設以麻黃本  
湯加葛根大發其汗將毋項背強几几者變爲經脉  
振搖動惕乎此仲景之所爲精義入神也

桂枝湯麻黃湯分主太陽之表葛根湯總主陽明之  
表小柴胡湯總主少陽之表三陽經合併受病即隨



表邪見證多寡定方絲絲入扣

三太陽與陽明合病不下利但嘔者葛根加半夏湯主

之原文

四太陽與陽明合病者必自下利葛根湯主之

原文

二條又以下利不下利辨別合病主風主寒之不同也風者陽也陽性上行故合陽明胃中之水飲而上逆寒者陰也陰性下行故合陽明胃中之水穀而下奔然上逆則必加半夏入葛根湯以滌飲止嘔若下

利則但用葛根湯以解兩經之邪不治利而利自止  
耳葛根湯即第一條桂枝湯加葛根不用麻黃者是  
也

五太陽與陽明合病喘而胸滿者不可下麻黃湯主之  
原文

兩經合病當合用兩經之藥何得偏用麻黃湯耶此  
見仲景析義之精蓋太陽邪在胸陽明邪在胃兩邪  
相合必上攻其肺所以喘而胸滿麻黃杏仁治肺氣

喘逆之專藥用之恰當正所謂內舉不避親也何偏之有

六太陽與少陽合病自下利者與黃芩湯若嘔者黃芩加半夏生薑湯

原文

太陽陽明合病下利表證爲多陽明少陽合病下利裏證爲多太陽少陽合病下利半表半裏之證爲多故用黃芩甘草芍藥太棗爲和法也

七陽明少陽合病必下利其脉不負者順也負者失也

互相尅賊名爲負也脉滑而數者有宿食也當下之宜

大承氣湯

原文

土木之邪交動則水穀不停而急奔故下利可必也  
陽明脉大少陽脉弦兩無相負乃爲順候然兩經合  
病陽明氣衰則弦脉獨見少陽勝而陽明負矣下之  
固是通因通用之法而土受尅賊之邪勢必藉大力  
之藥急從下奪乃爲解圍之善着然亦必其脉滑而  
且數有宿食者始爲當下無疑也設脉不滑數而遲

軟方慮土敗垂亡尚敢下之乎

按太陽與陽明合病陽明與少陽合病俱半兼陽明所以胃中之水穀不安而必自下利其有不下利者亦必水飲上越而嘔與少陽一經之證乾嘔者大不同也或利或嘔胃中之真氣與津液俱傷所以亟須散邪以安其胃更慮少陽勝而陽明負即當急下以救陽明其取用大承氣湯正迅掃外邪而承領元氣之義也設稍牽泥則脉之滑數必轉爲遲軟下之無

及矣微哉危哉

八三陽合病脉浮大上関上但欲眠睡目合則汗

九三陽合病腹滿身重難以轉側口不仁而面垢譫語  
遺尿發汗則譫語下之則額上生汗手足逆冷若自汗  
者白虎湯主之

原文

三陽合病五合之表裏俱傷故其脉浮大其證欲眠  
而目合則汗中州之擾亂可知矣此時發汗則偏於  
陽而陽明之津液倍竭故譫語益甚將成無陽之證

也下之則偏於陰而真陽以無偶而益孤故手足逆冷而額上生汗將成亡陽之證也既不宜於汗下惟有白虎一湯主解熱而不碍表裏在所急用然非自汗出則表猶未解尚未可用此證夏月最多當與瘧濕喝篇參看

按三陽經之受外邪太陽頭疼腰脊痛陽明日痛鼻乾不眠少陽寒熱往來口苦嘔渴各有專司合病者即兼司二陽三陽之證也仲景但以合之一字括其

義而歸重在下利與嘔喘胸滿之內症蓋以邪既相合其人腹內必有相合之微驗故也後人於此等處漫不加察是以不知合病爲何病耳再按少陽篇第九條云傷寒六七日發熱微惡寒支節煩疼微嘔心下支結外證未去者柴胡桂枝湯主之一條其證全是太陽與少陽合併之病但內無下利其嘔復微即不謂之合病心下支結又與心下痞鞭時如結胸者不同即不謂之併病乃知合併之病重在內有合併



之微驗非昌之臆說矣 後人謂三陽合病宜從中  
治此等議論似得仲景表邪未散用小柴胡湯裏熱  
已極用白虎湯之旨然未可向痴人說夢也設泥此  
則仲景所用麻黃湯大承氣湯之妙法萬不敢從矣  
噫吾安得盡闢捷徑爲周行也哉

### 併病

併病者兩經之證連串爲一如貫索然即兼併之義  
也併則不論多寡一經見三五證一經見一二證即

可言併病也然太陽證多陽明少陽證少如秦之併六國者乃病之常若陽明少陽證多太陽證少則太陽必將自罷又不得擬之爲六國併秦矣

一二陽併病太陽初得病時發其汗汗先出不徹因轉屬陽明續自微汗出不惡寒若太陽病證不罷者不可下下之爲逆如此可小發汗設面色緣緣正赤者陽氣怫鬱在表當解之熏之若發汗不徹不足言陽氣怫鬱不得越當汗不汗其人燥煩不知痛處乍在腹中乍在

四肢按之不可得其人短氣但坐以汗出不徹故也更

發汗則愈何以知汗出不徹以脉濡故知也

原文

二二陽併病太陽證罷但發潮熱手足絳絳汗出大便

難而譏語者下之則愈宜大承氣湯

原文

按二陽併病二條皆是太陽與陽明併也上條證初入陽明而太陽仍未罷宜小汗此條證已入陽明而太陽亦隨罷宜大下所以宜小汗大下之故昌言之已悉可以無贅但上條之文從前未有註釋茲特明

之太陽初得寒傷營之病以麻黃湯發其汗汗出而邪去病不傳矣因汗出不徹故傳陽明續自微汗出不惡寒陽明熱熾似乎當用下法以太陽之邪未徹故下之爲逆謂其必成結胸等症也如此者可小發汗然後下之設面色緣緣正赤者寒邪深重陽氣怫鬱在表必始先用麻黃湯或已用麻黃湯而未得汗所以重當解之熏之又非小發汗所能勝矣若是發汗不徹不足言陽氣怫鬱不得越也畢竟當汗不

汗其人燥煩不知痛處乍在腹中乍在四肢按之不可得方是陽氣不得越耳短氣者因汗而氣傷也脉濡者因汗而血傷也汗雖未徹其已得汗可知其不怫鬱又可知所以宜更他藥以小發其汗更字讀平聲與太陽中篇傷寒發汗解半日許復煩脉浮數者可更發汗互發然則彼更桂枝湯此更桂枝加葛根湯并可推矣

三太陽與少陽併病頭項強痛或眩冒時如結胸心下

痞鞭者當刺大椎第一間肺俞肝俞慎不可發汗發汗則譫語脉弦五六日譫語不止當刺期門

少陽之脉絡脇脇間併入太陽之邪則與結胸證似是而實非也肝與膽合刺肝俞所以瀉膽也膀胱不與肺合然肺主氣刺肺俞以通其氣斯膀胱之氣化行而邪自不能留矣發汗則譫語與合病木盛尅土之意同註謂水盛則生心火節外生枝反失正意脉弦亦即合病內少陽勝而陽明負之互詞此所以刺

期門隨木邪之實而瀉之也仲景通身手眼後人只泥於一手一目可乎

四太陽少陽併病心下鞭頸項強而眩者當刺大椎肺俞肝俞慎勿下之

原文

重申不可下之禁與上條不可汗互發

五太陽少陽併病而反下之成結胸心下鞭下利不止

水漿不下其人心煩

原文

悞下之變乃至結胸下利上下交征而陽明之居中

者水漿不入心煩待斃傷寒顧可易言哉 併病即  
不悞用汗下已如結胸心下痞鞭矣况加悞下乎此  
比太陽一經悞下之結胸殆有甚焉其人心煩似不  
了之語然仲景太陽經謂結胸證悉具煩燥者亦死  
意者此謂其人心煩者死乎

壞病

壞病者已汗已吐已下已溫鍼病猶不解治法多端  
無一定可擬故名之爲壞病也壞病與過經不解大



異過經不解者連三陰經俱已傳過故其治但在表裏差多差少宜先宜後之間若壞病則病在三陽未入於陰故其治但在陽經其證有結胸下利眩冒振惕驚悸譫妄嘔噦燥煩之不同其脉有弦促細數緊滑沉微澀弱結代之不同故必辨其脉證犯何逆然後得以法而治其逆也

一太陽病三日已發汗若吐若下若溫鍼仍不解者此爲壞病桂枝不中與也觀其脉證知犯何逆隨証治之

原文

相傳傷寒過經日久二三十日不痊者謂之壞病遂  
與過經不解之病無辨此古今大悞也仲景止說病  
三日即五六日亦未說到且此條止說太陽病連少  
陽亦未說到故謂桂枝偏表之法不可用觀下條太  
陽轉入少陽之壞證有柴胡證罷四字可見此爲桂  
枝證罷故不可復用也設桂枝證仍在即不得謂之  
壞病與少陽篇內柴胡證仍在者此雖已下之不爲

逆復與柴胡湯必蒸蒸而振却發熱汗出而解之大  
又互相綰照也豈有桂枝柴胡之證尚未罷而得指  
爲壞病之理哉故必細察其脉爲何脉證爲何證從  
前所悞今犯何逆然後隨其證而治之始爲當耳

二本太陽病不解轉入少陽者脇下鞅滿乾嘔不能食  
往來寒熱尚未吐下脉沉緊者與小柴胡湯若已吐下  
發汗溫鍼譟語柴胡證罷此爲壞病知犯何逆以法治  
之原文

按上條太陽經之壞病也此條少陽經之壞病也兩  
條文意互發其旨甚明叔和分彙致滋疑惑茲合而  
觀之乃知上條云桂枝湯不中與則其所犯要不離  
於太陽一經之悞吐悞下悞發汗悞燒鍼之諸逆也  
此條云柴胡湯不中與則其所犯要不離於少陽一  
經之悞吐悞下悞發汗悞燒鍼之諸逆也後人擬議  
何逆四治見爲創獲繇茲觀之真嚙語矣

痰病

慨自傷寒失傳後人乃以食積虛煩痰飲脚氣牽合  
爲類傷寒四證此等名目一出凡習傷寒之家苟簡  
粗疎已自不識要妙况復加冬溫溫病寒疫熱病濕  
溫風溫霍亂瘧內癘畜血爲類傷寒十四證頭上安  
頭愈求愈失茲欲直溯淵源不得不盡闢歧派蓋仲  
景於春夏秋三時之病既以冬月之傷寒統之則十  
四證亦皆傷寒中之所有也若諉之局外漫不加察  
至臨證模糊其何以應無窮之變哉昌於春夏病中

逐段拈出茲於三陽經後特立痰病一門凡痰飲素積之人有挾外感而動者有不繇外感而自動者仲景分別甚明挾外感之邪搏結胸脇三陽篇中已致詳矣此但舉不繇外感之痰病昭揭其旨俾學者辨證以施治焉耳

一病如桂枝證頭不痛項不强寸脉微浮胸中痞鞅氣上冲咽喉不得息者此爲胸有寒也當吐之宜瓜蒂散諸亡血虛家不可與

原文

寒者痰也痰飲內動身必有汗加以發熱惡寒全似  
中風但頭不痛項不强此非外入之風乃內蘊之痰  
窒塞胸間宜用瓜蒂散以湧出其痰也

二病人有寒復發汗胃中冷必吐衄

原文

寒亦痰也此即上條之互文上條辨非桂枝之證此  
條辨不可發汗蓋痰從內動無外感與俱誤發其汗  
必至迷塞經絡留連不返故示戒也設兼外感如三  
陽證中諸條則無形之感挾有形之痰結於一處非

汗則外邪必不解即強吐之其痰飲亦必不出所以  
小青龍一法卓擅奇功耳此言有痰無感悞發其汗  
重亡津液即大損陽氣其人胃冷而吐虵有必至也  
三病人手足厥冷脉乍緊者邪結在胸中心中滿而煩  
饑不能食者病在胸中當須吐之宜瓜蒂散

原文

手足厥冷與厥陰之熱深厥深相似其脉乍緊則有  
時不緊殊不似矣可見痰結在胸故滿煩而不能食  
亦宜瓜蒂爲吐法也




合三條總見痰證可吐不可汗合食積虛煩脚氣四  
證論之勿指爲類傷寒但指爲不可發汗則其理甚  
精蓋食積胸中陽氣不布更發汗則陽氣外越一團  
陰氣用事愈成危候虛煩則胃中津液日竭更發汗  
則津液盡亡矣脚氣即地氣之濕邪從足先受者正  
濕家不可發汗之義耳奈何舍正路而趨曲徑耶  
門人問曰吾師於三陽證中挈出合病併病壞病痰  
病之條可謂暗室一燈炯然達旦矣但不識陽明何

以無壞病耶答曰陽明之誤治最多其脉證固當辨別但不得以壞病名之也蓋陽明原有可汗可下之條汗下原不爲大逆且誤在汗當不誤在下矣誤在下當不誤在汗矣即使汗下燒鍼屢誤其病亦止在胃中原有定法可施與壞證無定法之例微有不協此壞病所以不入陽明耳

門人又問曰救陽明誤治之定法可得聞乎答曰仲景云陽明病脉浮而緊咽燥口苦腹滿而喘發熱汗

出不惡寒反惡熱身重若發汗則燥心憤憤反譫語  
若加燒鍼必怵惕煩燥不得眠若下之則胃中空虛  
客氣動膈心中懊懣舌上胎者梔子豉湯主之觀其  
悞汗悞燒鍼之變煩燥怵惕譫語不眠止是邪在胃  
中擾其津液與亡陽之證不同也觀其悞下之變客  
氣動膈心中懊懣止是熱邪上膈心逼不安與結胸  
之證不同也故遵內經高者越之之旨以梔子豉湯  
湧出其邪耳此非無定中之定法乎



尚論篇卷三